


PRONTUÀRIU PO CHINI TENIT SU PACEMAKER



CORU SARDU

CORU SARDU

ITA EST UNU PACEMAKER?

SU FUEDDU PACEMAKER
NDI BENIT DE S'INGLESU
E BOLIT NAI "CHI DONAT,
CHI INGENDRAT
IMPULSUS".

DIFATIS EST UNU
DISPOSITIVU
ELETRÒNICU CHI SERBIT
PO DONAI IMPULSUS
ELÈTRICUS A SU CORU,
PO DDU FAI BÀTIRI
COMENTI SI DEPI
EPO DDI FAI POMPAI
SU **SÀNGUINI** CHI SERBIT
CANDU NO ARRENNÈSCIIT
A DDU FAI A SOLU.

CANDU SI SUNFRIT DE
CORULENTU O DE
BATIMENTU DE CORU, SU
PACEMAKER PODIT
AGIUDAI A ARREGULAI
SU **RÌTIMU** DE SU CORU E
A MELLIORAI SA
CALIDADI DE SA VIDA.

COMENTI EST FATU SU PACEMAKER?

NARAUS CHI ASSIMBILLAT MEDA A UNA **SCATULEDDA**
PITICA COMENTI A UN'ARRELLÒGIU.




AÌNTURU DDOI PORTAT IS **BATERIAS** E CIRCÙITUS
SPECIALIS CHI SERBINT PO AVERIGUAI TOTU SU CHI
EST INCAPITENDI. ACAPIAUS DDOI TENIT FILUS
ELÈTRICUS (SI NANT **ELETROCATÈTERIS**) CHI
INTRANT IN SU CORU PO MORI DE UNA BENA E
SERBINT PO DONAI IS IMPULSUS ELÈTRICUS SCETI
CANDU NCI-ND'AT ABBISÒNGIU.

COMENTI SI PONIT?

SI PONIT IN SA PARTI ARTA DE IS PETURRAS,
ASUTA DE UNA BUSCIACA DE SA PEDDI, CUN UNA
OPERATZIONI CHI DDI NARANT **IMPIANTU**.



S'OPERATZIONI TOCAT FATA IN **ISPIDALI**, IN SA
SALA DE OPERAI, MA NO EST CUMPLICADA MEDA.
DIFATIS DURAT PAGU TEMPUS E SI FAIT CUN
S'ANESTESIA LOCALI. EST A NAI CHI SU MALÀDIU
EST **SCIDU** IN SU MENTRIS DE S'OPERATZIONI.



A PUSTIS DE
S'OPERATZIONI TOCAT A
ABARRAI FIRMUS
ASUMANCU PO 24 ORAS,
CHENA DE MOVI IS PALAS
E SU BRATZU, A MANERA
CHI SU **DISPOSITIVU** E
TOTU IS FILUS CHI TENIT
ACAPIAUS NO SI MOVANT.
A BELLU A BELLU,
PASSADA SA PRIMU CIDA,
SU MALÀDIU PODIT
TORRAI A IS **FAINAS** DE
DÒNNIA DÌ. EST NORMALI
CHI IN IS PRIMUS DIIS SU
MALÀDIU INTENDAT UNU
PAGU DE DOLORI E CHI SA
PARTI ARRESURTIT UNU
PAGU UNFRADA. DIFATIS
PO IS PRIMUS TEMPUS
EST **MELLUS** A NO
ARTZIAI PESUS CUN SU
BRATZU INTERESSAU DE
S'**IMPIANTU**.

SI TORRAT IN **ISPIDALI** A
PUSTIS DE UNU MESI DE
S'**IMPIANTU**, PO
AVERIGUAI CHI TOTU
SIAT ANDENDI BENI.
CANDU SI FAINT IS
VÌSITAS DE CONTROLLU,
SU DOTORI AVERÌGUAT
DÒNNIA BORTA SU
LIVELLU DE SA **BATERIA**,
CHI DURAT ASUMANCU 5
ANNUS.

CANDU EST SCÀRRIGA,
TOCAT A PONNI UNU
DISPOSITIVU NOU, MA
S'OPERATZIONI EST
PRUS LESTRA DE S'
IMPIANTU E S'ABARRAT
ARRICOVERAUS SCETI PO
UNA DÌ.




IS PACEMAKER NO FUNT
TOTUS AGUALIS. SU
DOTORI SCEBERAT SU
CHI ANDAT **MELLUS** PO
DÒNNIA CORU E PO SU
CHI DDI SERBIT.

CANDU SI TORRAT A
DOMU, A CHINI PORTAT
SU PACEMAKER, DDI
DONANT UNA **TÈSSERA**
CHI TOCAT A TENNI
SÈMPIRI AVATU, INNUI
DDOI AT SCRITU TOTU SU
CHI PERTOCAT SU
PACEMAKER.

AICI CHI INCAPITAT DE
S'INTENDI MALI, CUN
CUSSA **TÈSSERA**, DÒNNIA
DOTORI PODIT SCIRI ITA
PACEMAKER PORTAT SU
MALÀDIU E AICI
CUMPRENDI **MELLUS**
COMENTI ESSI DE
AGIUDU.

ITA TOCAT A SCIRI

A PUSTIS DE UNU TEMPUS DE **PÀSIU** DE ASUMANCU
4 CIDAS SI PODIT TORRAI A FAI IS COSAS DE
DÒNNIA DÌ. MA EST SU DOTORI, E SCETI ISSU, CHI
NARAT CANDU EST CHI FAIT.



A S'INGHITZU EST **MELLUS** A DONAI ATENTZIONI A
TOTU SU CHI EST **PERIGULOSU** E PODIT FAI DANNU,
COMENTI A CANDU INCAPITAT DE PIGAI UNU CORPU,
DE S'INGOLLI O DE NC'ARRUI.

ITA FAIT A FAI

A PUSTIS DE CUSTU TEMPUS DE **PÀSIU**, SU DOTORI
CUNSILLAT DE FAI ATIVIDADIS **LÈBIAS**,
PRUSCHETOTU **AERÒBICAS** COMENTI CAMMINAI,
CURRI O ANDAI A BITZICLETA.



INVÈCIAS EST **MELLUS** A NO FAI CUSSUS SPORT
INNUI IS MÙSCULUS DE SU PETUS TRABALLANT
MEDA, CA PODINT **CUMPROMITI** SU
FUNTZIONAMENTU DE SU **DISPOSITIVU**.


CHI PORTAT SU PACEMAKER PODIT TENNI
UN'ATIVIDADI SESSUALI NORMALI.

BIAXIS

CHI PORTAT SU
PACEMAKER, SI NO TENIT
ÀTERAS MALADIAS CHI
NO DDU PERMITINT,
PODIT BIAXAI **SULENU**
CUN CALISISIAT MÈDIU:
IN NAVI, IN APARÈCHIU,
IN TRENU, IN VETURA,
CUN SU POSTALI.

IS **DISPOSITIVUS** CHI
IMPREAUS DDUS FAINT
AZIENDAS FAMADAS E
CONNOTAS IN TOTU SU
MUNDU.

DUNCAS EST FÀTZILI A
DDUS **IDENTIFICAI** IN
DÒNNIA LOGU E DDUS
AVERIGUAI PO MORI DE
SA **TÈSSERA**.



SEGURESA IN AEROPORTUS E BANCAS

IN AEROPORTU, INNANTIS DE PASSAI ME IS
CUNTROLLUS, TOCAT A **INFORMAI** SU
PERSONALI NARENDI DE SU PACEMAKER E
AMMOSTENDI SA **TÈSSERA**. PUSTIS SI PASSAT
IN SU GIASSU DE CUNTROLLU MA DONENDI
ATENTZIONI. DIFATIS TOCAT A SI-NCI **STESIAI**
LUEGU CHI PIGAT A SCIMÌNGIUS DE CONCA O A
BATIMENTU DE CORU.
SI SU PERSONALI DE S'AEROPORTU IMPITAT SU
METAL DETECTOR, TOCAT AVISAU DE NO DDU
PASSAI ASUBA DE SU **DISPOSITIVU**.



PO ÀTERAS CURAS MÈDICAS E ORTODÒNTICAS




CANDU SI TENIT SU PACEMAKER, INNANTIS DE
FAI CALISISIAT ÀTERA **CURA** MÈDICA,
ESÀMINIS, CURAS DE BELLESA, TOCAT
INFORMAU SU **PERSONALI SANITÀRIU**, POITA
CA UNUS CANTU TRATAMENTUS PODINT MUDAI
SU **FUNTZIONAMENTU** DE SU PACEMAKER E
TOCAT A ABARRAI ATENTZIONAUS PO NO FAI
DANNUS.

A DÒNNIA MANERA SU DOTORI, CANDU SI-NCI
MANDAT A DOMU, S'AT A A DONAI SA LISTA
CUN TOTU IS **ARRECUMANDÌTZIAS**.

CUMPATIBILIDADI ELETROMAGNÈTICA

CANDU S'AGATAUS ACANTA DE **DISPOSITIVUS** ELÈTRICUS CHI PORTANT UNU **MAGNETE** SI FORMANT CAMPUS DE ENERGIA CHI PODINT MUDAI SU **FUNTZIONAMENTU** DE SU PACEMAKER. SA MAJORIA DE IS CAMPUS ENERGETICUS FUNT DÈBILIS E NO FUNT DANNOSUS.

MA CALCHI APARECHIADURA ELÈTRICA TENIT UNU CAMPU ENERGETICU PRUS FORTI E PODIT INGENDRAI **INTERFERÈNTZIAS**, PONENDI IN **PERÌGULU** SU MALÀDIU. PO SU CHI PERTOCAT S'IMPREU DE SU TELEFONEDDU, SU CUNSILLU EST DE NO DDU PONNI ASUBA DE SU PACEMAKER E CANDU SI TELÈFONAT, EST **MELLUS** A DD'ACOSTAI A S'ORIGA DE S'ÀTERA PARTI.



ÀTERUS CUN'SILLUS

- ARREGORDA-TI-NDI DE PIGAI TOTU IS **MEXINAS** CHI T'AT DONAU SU DOTORI.
- ARREGORDA-TI-NDI DE ANDAI SÈMPIRI A IS **VÌSITAS** DE CONTROLLU DE SU PACEMAKER E SI PO CALCHI ARREXONI NO DDOI PODIS ANDAI, FAI-DDU SCIRI A SU DOTORI PO PRENOTAI UN'ÀTERA VÌSITA.
- ARREGORDA-TI-NDI DE PORTAI AVATU SA **TÈSSERA** DE PORTADORI DE PACEMAKER, MANCAI PONENDI-DDA IMPARI A IS ÀTERUS DOCUMENTUS PERSONALIS.
- FAI **SCIRI** A SU DOTORI SI TI-ND'ACATAS CHI SA FERIDA EST BOGHENDI MATÈRIA O CHI SI UNFRAT, CHI SES A SCIMÌNGIUS DE CONCA, A CALLENTURA, CHI TENIS DOLORI A PETUS O CHI T'INTENDIS DÈBILI.
- •NO TI NDI SCARÈSCIAS DE NAI A SU **PERSONALI SANITÀRIU** CHI PORTAS SU PACEMAKER.
- SIGHI SÈMPIRI IS **ÌNDICUS** CHI T'AT DONAU SU DOTORI PO FAI SPORT O ÀTERAS FAINAS DE TRABALLU.

PROGETU CORU SARDU
SERVÌTZIU LÌNGUA SARDA

FINANTZIAU CUNFORMAS
A SA L. 482/99 E L.R. 22/18 .
ANNUALIDADI 2022/2023

ISPIDALI NOSTA SENNORA DE BONÀRIA
SANTU'ÈNGIU (SU)
REPARTU DE CARDIOLOGIA
DIRETORI DR. GIANFRANCO DELOGU

POSTA ELETRÒNICA: CORUSARDU@GMAIL.COM



ASL Mediocampidano
Azienda socio-sanitaria locale

